

ირაკლი ბულრიძე - გაუტეხელი სული და პროფესიული ზრდის გზა

ირაკლი ბულრიძე ბავშვობიდანვე განსაკუთრებული ნიჭით გამოირჩეოდა, თუმცა, მისი გზა პროფესიონალურ ფეხბურთამდე იოლი არ ყოფილა. მან მწვრთნელის უარყოფა მოტივაციად აქცია და წამით არ თქვა უარი მის მიზნებზე. ეს არის ამბავი დაუღალავი შრომისა და მიზნებისკენ ლტოლვის შესახებ.

“მთავარი ფეხბურთის სიყვარულია, ეს ყველაფრის ძალას მოგცემს და ყველა დაბრკოლებას გადაგალახინებს” - ირაკლი ბულრიძე.

ირაკლის პოტენციალი, ჯერ კიდევ პატარა ასაკში, ოჯახის მეგობრებმა შენიშნეს. ისინი ხედავდნენ მის უნარს და ურჩიეს ოჯახს, ბიჭი ნიჭის განსავითარებლად ფეხბურთზე მიეყვანათ. ტექნიკურობამ და შრომისმოყვარეობამ, რომლითაც ბავშვობიდან გამოირჩეოდა, ის საქართველოს ეროვნული ნაკრების ასაკობრივ გუნდამდე მიიყვანა, სადაც ხალხს თავი შემოსვლიდან 21 წამში გატანილი გოლით დაამახსოვრა. კარიერის ყველაზე ემოციურ მომენტად ფეხბურთელი სწორედ ამ გოლს იხსენებს. ირაკლი ნაკრების არაერთ ასაკობრივ გუნდში თამაშობდა. თამაშობდა თბილისის “ლოკომოტივში”, სადაც დიდი მოლოდინები და იმედები გააჩნდა, თუმცა, მალე მის კარიერაში პირველი სერიოზული წინაღობა გამოჩნდა. 19 წლის ასაკში ირაკლი “ლოკომოტივიდან” გაუშვეს. მწვრთნელმა მიზეზად ის დაასახელა, რომ მისი დონე უმაღლესი ლიგისთვის არ იყო საკმარისი და მეორე ლიგისთვის მარტივად გაიმეტა. ირაკლი ყველაზე მძიმედ ამ პერიოდს იხსენებს.

“ეს სიტყვები ჩემთვის მიუღებელი იყო,” ამბობს ირაკლი. **„თითქმის ყველა ასაკობრივ ნაკრებში ერთ-ერთი წამყვანი ფეხბურთელი ვიყავი და ერთი მწვრთნელის სიტყვებს არ გადავაწყვეტინებდი ჩემი კარიერის უკან წასვლას.“** მისი ამბავი საქართველოში გავრცელებულ საფეხბურთო რეალობას უკავშირდება, სადაც მსგავს წინააღობების წინაშე ბევრი ახალგაზრდა ფეხბურთელი დგას.

ამის შემდეგ, ფეხბურთელის კარიერაში გარდამტეხი მოვლენა მოხდა. ბულრიძე საჩხერის “ჩიხურაში” გადავიდა. მის ცხოვრებაში ყველაფერი რადიკალურად შეიცვალა. “ჩიხურაში” თავის გამოჩენის შემდეგ ირაკლი პირდაპირ ბელგიურ “ბეერსხოტში” მოხვდა.

“ასეთი ტრანსფერები იშვიათია და ვფიქრობ, იმ ერთ წელში, რომელიც ბელგიაში გავატარე, დავუმტკიცე კლუბსაც და ჩემს ყოფილ მწვრთნელსაც ჩემი შესაძლებლობები.” - ამბობს ბულრიძე. მას მთელი ცხოვრება მწარედ ახსოვს იმ მწვრთნელის სიტყვები, რომელმაც 19 წლის ბიჭს ყველანაირი იმედები მოუსპო.

“კარგია რომ ასეთი ხასიათის ვიყავი, არ დავნებდი და ასმაგი შემართებით მივუბრუნდი ჩემს საქმეს, მაგრამ ხომ შეიძლება ვიღაცისთვის მწვრთნელის ეს სიტყვები გადამწყვეტი იყოს და ფეხბურთზე უარი ათქმევინოს?!”

ირაკლი მის ყველაზე დიდ გულშემატკივრად, მოტივატორად და ხელის შემწყობად მეუღლეს მიჩნევს და ფეხბურთელის ყველა გოლიც სწორედ მას ეძღვნება. ირაკლის აზრით ფეხბურთის თამაშში მთავარი ამ სპორტის სიყვარულია, შემდეგ მოდის ფიზიკური მომზადება, ხასიათი და სულისკვეთება.

ბელგიიდან დაბრუნებულმა ირაკლიმ კარიერა “დინამო თბილისში” განაგრძო, სადაც 2019/20 წლების ჩემპიონი გახდა. მოგვიანებით, გორის “დილას” ღირსებას იცავდა, ხოლო 2022 წელს ქუთაისის “ტორპედოსთან” ერთად საქართველოს თასი მოიგო. “ტორპედოში” თითქმის ყოველთვის ძირითადის ფეხბურთელი იყო. ახალგაზრდა ვინგერმა თავი ბევრჯერ გამოიჩინა გოლებით, თუმცა, ამ გუნდის დატოვებაც მოუწია და კარიერა ყაზახეთში გააგრძელა.

ფეხბურთელი ყაზახეთში გატარებულ პერიოდს თავისი ცხოვრების ერთ-ერთ ყველაზე რთულ ფაზად ასახელებს. ყაზახეთში დატვირთვა მეტი იყო, იმაზე ბევრად მეტს ითხოვდნენ მისგან, ვიდრე საქართველოში. ყაზახეთში ცხოვრება და იქაურ საფეხბურთო რეჟიმზე ფეხის აწყობაც საკმაოდ სტრესული იყო მისთვის. 2024 წლის ზაფხულში მას დიდი დაბრუნება ჰქონდა ეროვნულ ლიგაში. 26 წლის ფეხბურთელი კარიერას გორის “დილაში” აგრძელებს და კარიერის აღმავალ ეტაპზეა. ირაკლი “დილასთან” ერთად ჩემპიონობისთვის იბრძვის. მან გორის დილას რიგებში ბოლო ორ თამაშში 3 გოლი გაიტანა. აქედან ბოლოს გატანილი გოლით გუნდს გამარჯვება მოუტანა და პირველ ადგილზე გადაიყვანა.

გუნდური მუშაობის უნარი ფეხბურთელისთვის მნიშვნელოვანია, ირაკლის ყველა გუნდელი დადებითად ახასიათებს და გუნდში ერთ-ერთ საკვანძო ფიგურად მიიჩნევენ. მიუხედავად იმისა, რომ ხშირად სათადარიგოდან იწყებს თამაშებს, ის გუნდისთვის დიდ ძალას წარმოადგენს.

“ირაკლი გამორჩეული და ქართველი ხალხისთვის ნაცნობი ფეხბურთელია. ერთი-ერთზე უძლიერესია, კარგი დრიბლინგი აქვს და ბოლო თამაშებში გადამწყვეტი გოლები სწორედ მან გაიტანა. ვფიქრობ, ბევრი ქართველი ფეხბურთელისთვის მისაზამია და კარგი კარიერა აქვს. მას ყველაფერი აქვს იმისთვის, რომ დიდი ფეხბურთი ითამაშოს და მჯერა, რომ ნაკრებშიც და გრანდ კლუბებშიც ვიხილავთ” - ამბობს გორის “დილას” ფეხბურთელი ოთარ ფარულავა.

“ირაკლი ჩემთვის ძალიან მნიშვნელოვანი ფეხბურთელია, ნამდვილი პროფესიონალია. სტილი, ტექნიკა, ყველაფერი უმაღლეს დონეზე აქვს და მაშინ, როცა თამაში ცუდად მიგვდის, ის ჩემი საგანძურია. მისი იმედი მაქვს, როცა თამაშის შემოტრიალება მინდა ვიცი, რომ მას შემოვიყვან და ეს ასეც მოხდება.” – გორის დილას პორტუგალიელი მწვრთნელის რიკარდო კოშტას განცხადება.

მიუხედავად იმისა, რომ მის პოზიციაზე გორის დილას მთავარი ბომბარდირი თამაშობს, ირაკლი მწვრთნელის თვალში მაინც ძალიან საჭირო ფეხბურთელად რჩება. “ის განსაკუთრებულია” – ასე ახასიათებს მას პორტუგალიელი.

ფეხბურთელის კარიერას ბევრი წარმატება და წარუმატებლობა ახლავს თან. ირაკლი იმის მაგალითია, რომ რაც არუნდა მოხდეს, შენს ოცნებებზე უარი არ უნდა თქვა და არ უნდა დანებდე – “კარიერაში ბევრ წინაღობას შევხვდი, თუმცა წამით არ მიფიქრია, რომ ფეხბურთს თავს დავანებებდი და ახალგაზრდებსაც იგივეს ვურჩევ.”

ფეხბურთელის მთავარ ოცნებად საქართველოს ნაკრების რიგებში თამაში რჩება და ამისთვის ძალ-ღონეს არ იშურებს. ირაკლის ოცნება ევროასპარეზოზე გასვლაა, ნაკრებთან ან მის გუნდთან ერთად.